

nangminek aijomavlunga, sullijaksakaralloarmulle aijungnarniarpallungilanga."

"Ainiarpunga," Daniel okarpok tagvainak, "ainiarpunga mânna." Okautjaukârdlunelo Jessikab iglungata nanêninganik, kollit kammipait, angeralerporlo.

Unnugutjaugalloarpok; Jessikab iglomêviksanga kanningitôvok, Danielible issumajârutekarningata angeratingilâ. Attausiardlune apkosineâluit illangata terrekoane nokkarpok innilaigosumariklune, okautilune nangminermirik, uvlâkut kâfesioryik angerautjautuarpat Jessika aiviginiaromavlugo. Taimagle issumaksarsiorlilugo, allagaiksarlune tautugasugivok Jessikab kênanaganik, aungêliktitomik sivunermigut aijomik, sangukattartomik, takkojomakpat sorlo, Daniel mallingimangât. Allagaiksarnetuinauvorle, unêlle, ullingne senneroarlugo kajusivok, tagvaneluatsiarlo Jessika aivigivâ.

Iglorusermut tikkingmat tâlerêrpok, upkoêrmallo siutekortôjuk innikita upkoanganik, sivurânelo tautugungnarane sumik, nangiarkassakpok. Tagvane nangerlune aggangit upkoab upkoêrutinganêdlutik sulle, nippikitomik tussarpok kollermik.

"Atâtavut," nippeârsuk okarpok, "kinatuinarmik tilliklilaurittôk uvamnut, Jêsuse Kristuse pivlugo."

"Mânêpunga, Jess," Daniel kaigarsukpok, ijigiglo sungiutingmannik târmik, majutesivok takpaungajutiksanic. Kammatsiarlune majorarpok majutit tungmerangitigut serkorpalludlartutigut iglomut tâktomut, sorrutsib innigijanganut. Nakudlartomik ikkitjusijarpok, ikkitjutitalik ikpiarsuminut pôrsimangmago, pak kôjavinerkullungmiglotauk, taimaimat mânnakullukut ikkomakartitsivok. Jessika nellangavok ivituinait kângine, makpilitat pêjarsimanginginita nellâne, keppiksatuakarlune annorâvininganik. Daniele arlorvigigamiuk kungataililungilak.

"Illa," okarpok kuviasuklune, nippemulle sangê-